

## ***Sigurnost opreme na dječijim igralištima***

---

Dječija igrališta su prostori za igru djece koje se nalaze na javnim površinama ili u zatvorenom prostoru. Djeca provode na igralištima dosta svoga vremena i za to vrijeme oprema, koju koriste na igralištima, i podloge moraju biti sigurne da ne izazovu povrede kod djece. Posebnu pažnju skrećemo roditeljima da djeca nisu često u stanju da prepoznaju opasnosti koje prijete na igralištu i da su odgovorni za sigurnost svog djeteta. Savjetujemo roditeljima da uvijek pregledaju igralište prije nego se dijete počne igrati, kako bi se izbjegle moguće neželjene posljedice.

Oprema na dječijim igralištima mora ispunjavati opće i dodatne posebne sigurnosne zahtjeve propisane u standardu BAS EN 1176:2011 i dijelovima ovog standarda.



### ***Najčešći rizici***

Najčešći rizici kojima su djeca izložena prilikom korištenja opreme na dječijim igralištima su rizici od povreda koje mogu nastati ukoliko je oprema koja se nalazi na igralištima oštećena, dotrajala, uništena ili ne ispunjava propisane sigurnosne zahtjeve. Primjeri oštećene i dotrajale opreme na dječijim igralištima prikazani su na sljedećim slikama:



### ***Savjeti za provjeru dječijeg igrališta:***

- ✓ provjerite da li su temelji vidljivi ili pokriveni materijalom koji ublažava udarce,
- ✓ provjerite stabilnost tobogana, vrtuljaka, klackalica; protresite ih snažno da provjerite jesu li čvrsto postavljeni i dovoljno stabilni,
- ✓ provjerite da li su na opremi zahrđali dijelovi i da li vire ekseri, vijci ili žice na koje bi se djeca mogla povrijediti,
- ✓ ako je oprema na igralištu od drveta, provjerite da li je površina glatka ili ima pukotine ili rascjepe od drveta na koje se dijete može ozlijediti ili je možda drvo trulo i može li puknuti pod opterećenjem,
- ✓ ako je oprema od metala, provjerite da li ima oštih rubova ili oštećenja na koje bi se dijete moglo porezati,
- ✓ provjerite lanac koji drži ljuljačku, da li se može djetetu zaglaviti prst u lancu i da li je lanac oštećen,
- ✓ ako se na opremi nalaze užadi, provjerite u kakvom su stanju i da li su oštećena ili dotrajala,
- ✓ provjerite da li postoji zaštitna podloga oko opreme (oko svake opreme bi trebala biti zaštitna podloga dovoljna da prekrije cijeli zaštitni prostor oko opreme - oko 1.5 m od opreme ovisno o visini opreme na kojoj se dijete igra),
- ✓ provjerite s dječjim grabljicama sadržaj pješčanika prije nego se dijete počne igrati. Često se mogu pronaći narkomanske igle, staklo, izmet pasa i mačaka i kojekakvog ostalog smeća. Najbolje bi bilo da se dijete ne igra u otvorenim pješčanicima jer uglavnom nisu zaštićeni i mogući su izvor zaraze,
- ✓ u slučaju da ste primijetili neispravnu ili uništenu opremu na dječjem igralištu, odmah obavijestite nadležni organ.